

DIDZA' BSÖLĚ'Ě PABLO YÖDZ FILIPOS

**Pablo rugapĕ' Dios bunách
queĕ' Cristo nacu'ĕ Filipos**

1 Neda', Pablo, lenca' bi'i Timoteo, nactu' huen dxin queĕ' Jesucristo. Rugapa' Dios lbi'ili', réjlĕ'li' Cristo, len lbi'ili', dĕ lu na'li' xchinĕ' Cristo, len lbi'ili', run chi'li' bunách queĕ' Cristo, zoali' Filipos, náquili' queĕ' Dios len nacli' tuz len Jesucristo. ²Rnabda'-nĕ' Xuzru' Dios lenca' Xanru' Jesucristo gunnĕ' queĕli' le ruzá' ladxĕ'ĕ queĕru' len gunĕ' ga soa dxi icj ládxi'dau'li'.

**Pablo rnabnĕ' Dios bi gunĕ'
quegac bunách ta'yejlĕ' Cristo**

³Rĕpa'-nĕ' Dios: Xclenu', cati' rza' ladxa'a queĕli'. ⁴Cati' rulidza'-nĕ' Dios len rnabda'-nĕ' gáclenĕ' lbi'ili', rudziji ladxa'a ⁵le rajneyda' ca bĕnlenli' neda' tsaxón dxin qui didza' dxi'a, gzu lauli' runli' dxin na' dza ni' zi'a byónili', len runli' lei ga rdxintĕ na'a dza. ⁶Dios gzu lahuĕ' runĕ' tu le nac dxi'a lu icj ládxi'dau'li'. Ruzxóni ladxa'a Lĕ' gúnteczĕ' cni ga gdxintĕ dza huödĕ' Jesucristo. ⁷Ca na' rza' ladxa'a queĕli' nac ca ral-la' guna' le nadxí'itsquida' lbi'ili'. Yúgu'tĕli'

ruzi'li' xbey tsaxón len neda' le ruzá' ladxĕ'ĕ queĕru' Dios, tsal ni yu'a lidx guia, len lĕzca' cni benli' cati' ni' bĕ'a didza', bena' lban qui didza' dxi'a len bena' ga bdxin queĕli' tsaz. ⁸Nözcznĕ' Dios ca nadxí'itsquida' lbi'ili', nac ca na' nadxí'itsquinĕ' rĕ'u Lĕczĕ' Jesucristo. ⁹Rnabda'-nĕ' Dios gunĕ' ga gdxiri'li' lza'li', len gáta'tsca queĕli' yöl-la' rac szxóni len yöl-la' rejni'i gdu ¹⁰quiĕ gac cöli' le nactĕr dxi'a. Chqui' gac cni queĕli', gacli' gdu dxi'a ati' nutu nu gac bi gnĕ queĕli' dza ni' huödĕ' Cristo. ¹¹Le nacli' nac bĕ' le nac dxi'a runĕ' Cristo lu icj ládxi'dau'li' quiĕ gla' lahui yöl-la' yení' queĕ' Dios len gac queĕ' yöl-la' ba.

**Zoaru' nabanru' quiĕ
gacru' ca naquĕ' Cristo**

¹²Böchi' lza'adau', rĕ'nda' gnózili' lĕ ni: Yúgu'tĕ le guc quia' guclen neda' quiĕ gzxáqui'rda' bena' lban qui didza' dxi'a. ¹³Cni guc, yúgu'tĕ ni'a na'quĕ' bönni' yúlahui' len yezíca'rĕ' bönni' ni nözcne' yu'a lidx guia ni le runa' xchinĕ' Cristo. ¹⁴Le yu'a neda' lidx guia ni ben ga nácgacrĕ' rugu ladxi' yelati'z cunuhoúagactĕ' bóchi'ru', tu'zxóni

ládxi'què' Xanru' len cutur tádxinè' tunè' lban qui xtidzè'è Dios.

¹⁵Le nactè tunè' lban queè' Cristo la'què' le tu'zxé'inè' neda' len ta'dil-lè', san yela'què' tunè' lban queè' gdu ládxi'què'. ¹⁶Bönni' tu'zxé'inè' na' tunè' lban queè' Cristo lu yöl-la' run ba zxön cuinquè' len clèg gdu ládxi'què'. Tè'nnè' lusaca' zi'è neda' tsal ni yu'a lidx guia. ¹⁷Bönni' gdu ládxi'què' na', lu yöl-la' nadxí'i quequè' tunè' lban queè', le nözcne' Dioscz budödè' lu na'a dxin runa', runa' lban qui didza' dxi'a. ¹⁸Cutu run ga rö'a baguí'i lè na'. Rudzijda' le rac lban queè' Cristo nácti'tèz, zal-la' tunè' lban gdu ládxi'què' o cutunè' lei cni.

Na'a, rudzijrda' ¹⁹le nözda' ulá' lu le rac quia', yu'a lidx guia ni, le rulidzli'-nè' Dios len le ráclenè' neda' Dios Bö' La'y, Nu rsölè'è queèru' Jesucristo. ²⁰Cni rè'nda', len ruzxöni ladxa'a-nè' Dios, gunè' ga cutu utui'da', len gunè' ga gac gu'a didza' lu yöl-la' rugu ladxí', ati' lu na'a neda' gactecz yöl-la' ba queè' Cristo na'a dza len yugu' dza zi'a za'c, zal-la' gun bayúdx gattea' o soa' gbana'. ²¹Ca runi neda', chqui' zoa' nabana', nac quiè gaca' ca naquè' Cristo, len chqui' gatia', nac tu le uzi'ra' xbey. ²²Chqui' huac guna' dxin le gaclen didza' dxi'a queè' Cristo chqui' soaza' gbana', cutu nözda' bizxal ral-la' cöa'. ²³Nac baníg cöa'. Rè'nda' gattea' quiè tsajsóalentea'-nè' Cristo, le gactèr dxi'a quia' lè na', ²⁴san runn bayúdx soaza' gbana' quiè sáqui'da' gáclena' lbi'ili'. ²⁵Le nözda' nac cni, nözda' ca' ugá'nlena' lbi'ili'

quiè gáclena' lbi'ili' quiè gacr gdu ca réjlè'li' Cristo, ati' udzjírli' le réjlè'li' Lè'. ²⁶Cni nac, dusóalena' lbi'ili' leyúbl, le gun ga gdzag ládxi'li'-nè' Jesucristo ni'a qui le gunè', gáclenè' neda'.

²⁷Gul-guí' ládxi'zli' gacli' ca rajlóz didza' dxi'a queè' Cristo. Cni gac, chqui' duyúa' lbi'ili' o chqui' soa' zi'tu', huayönda' nacli' tsutsu len nacli' tuz, runli' tsazxón dxin qui le réjlè'ru' le za' queèru' ni'a qui didza' dxi'a. ²⁸Cutu güi'li' latj lun gadxi lbi'ili' nup cuta'le'i lbi'ili' dxi'a. Lè ni uluf'i lequè' la'nitiè', san ulali' lbi'ili', le gac bè' ráclenè' lbi'ili' Dioscz. ²⁹Dios ru'è lbi'ili' latj gunli' xchinè' Cristo, clègz ca réjlè'li' Lè', san lèzca' ca rzaca' rgui'li' runli' xchinè'. ³⁰Na'a, gac gunli' neda' tsazxón güi' ládxi'ru' gunru' lban qui didza' dxi'a. Blé'iczli' ca gzxaca' gdi'a cati' bena' cni zi'al, ati' ryónili' ca rzaca' rgui'a ca' na'a.

Guquè' nöx ladxí' Cristo, ati' bdél-li'nè' yöl-la' zxön

2 Chqui' rutipè' ládxi'li' Cristo, len chqui' lu yöl-la' nadxí'i queè' ruhuechi' ladxè'è lbi'ili', len chqui' nacli' tuz len Dios Bö' La'y, len chqui' nadxi'ili' lza'li' len ruhuechi' ládxi'li' lza'li' tuli' yetuli', ²gul-gún ga udziji ladxa'a. Quiè gunli' cni, ral-la' gacli' tuz len lza'li' len gac tuz ca nadxi'ili' lza'li' tuli' yetuli'. Lèzca' cni ral-la' gacli' tuz lu bö' nacczli' len ca rza' ládxi'li'. ³Ca nac le runli', cutu bi ral-la' gunli' lu yöl-la' rudul-li' queèli' o quiè gun ba zxön cuinli', san dxí'adau' ral-la' gunli' yúgu'tè, cutu gáquili' nadél-li'rli' lbi'ili' ca lza'li'. ⁴Gul-guí'

ládxi'li' gac dxi'a ca' qui lza'li' len clëg queëzli'.

⁵Ral-la' gacli' nöxj ladxi' ca na' guquë' nöxj ladxi' Jesucristo. ⁶Lë' nacczë' tuz ca naquë' Dioscz, san cutu gúquinë' ral-la' gunë' bayúdx uga'në' tuz ca na' naquë' Dios. ⁷Buca'nczë' yúgu'të le napë', len ben cuinë' ca tu bönni' nada'u. Guljë' ca talj bunách len guquë' gdu bunách. ⁸Cati' ni' naquë' bönni', guquë' nöxj ladxi' len benë' ca rna xtidzë'ë Dios, gutië'. Gdë'ë lë'i yag cruz ca na' rac queë' bönni' gdödi bunách. ⁹Qui lë ni na' Dios buchisë' Lë', benë' ga naquë' blau ni' yehua' yubá, len benë' ga lë' le nactër blau ca yúgu'të lagac bunách. ¹⁰Cni benë' Dios quië cati' la'yöni ca na' lë' Jesús, luzechu zxibgac yúgu'të nup nacua' yehua' yubá, len yödzyú, len lu latj chul. ¹¹Yúgu'të' la'guixjö'ë yalj lulu naquë' Xanru' Jesucristo quië gac yöl-la' ba queë' Xuzru' Dios.

**Ral-la' gacru' ca le ta'gú'u
yeni' yödzyú ni**

¹²Qui lë ni na', böchi' lza'adau', ca na' benli' ca rna xtidza'a cati' ni' zóalena' lbi'ili', runr bayúdx gunli' ca rna xtidza'a na'a, tsal ni zoa' zi'tu' ga zoali'. Gul-gún xchinë' Xanru' ga gdxintë dza udx uslë' lbi'ili'. Gul-gún cni lu yöl-la' radxi queëli' Lë' len lu yöl-la' rxziz. ¹³Lëczë' Dios runë' dxin lu icj ládxi'dau'li', runë' ga ré'nili' gunli' le rdzag ladxë'ë Lë' len runë' ca' ga sáqui'li' gunli' lë na'. ¹⁴Gul-gún yúgu'të le ral-la' gunli', cutu bi gnëli' qui, len cutu til-l dídza'li'. ¹⁵Cni ral-la' gunli', cui

gac nu bi gnë queëli', san quië gacli' zxi'në' Dios, nacli' gdu dxi'a yödzyú ga ni zoali' ladj bunách cunacgac tsahui' len nuca'ngac Dios. Lbi'ili' rgu'li' yení' ladjquë' ca na' ta'gú'u yení' bölj luzxbá cati' ni nac chul, ¹⁶ruí'li' lauquë' didza' gbánicnë'. Chqui' cni gunli', huac udzjitsquida' dza huödë' Cristo ni'a qui le nacczli', le gnözda' cutu guc daduz gzoa' banádx gatia' len clëg daduz bena' dxin. ¹⁷Yöl-la' rejlë' queëli' Cristo nac tu le rdzag ladxë'ë Dios. Zal-la' gun bayúdx gatia' quië gac gdu yöl-la' rejlë' queëli' Lë', udzijda' len uzí'lëna' xbey tsaxón yúgu'tëli'. ¹⁸Lëzca' cni ral-la' udzjili' lbi'ili' len uzí'lëni' tsaxón neda' xbey.

**Ca tunbi' bi'i Timoteo
len bi'i Epafrodito**

¹⁹Chqui' cni rë'nnë' Xanru' Jesús, runa' löz gsóla'tea'-bi' queëli' bi'i Timoteo, ati' ni'r udzijda' cati' huödbi' dudíxjöi'bi' neda' catëz rac queëli'. ²⁰Tuzbi' lëbi' rza' ládxi'bi' ca na' rza' ladxa'a neda', len sxzöni rui' ládxi'bi' lbi'ili'. ²¹Yúgu'të bönni' yezica', le nac quegaczë' tui' ládxi'quë'. Cutu tui' ládxi'quë' xchinë' Cristo. ²²Nózcizli' ca benbi' bi'i Timoteo, burujbi' dxi'a. Tsaxón bënlenbi' neda' dxin qui didza' dxi'a, nachi' quia' ca tubi' bi'i bönni', tsaxón rúnlenbi'-në' xuzbi' dxin. ²³Gsöla'a-bi' ga zoali' bi'i Timoteo cati' gnözda' nacx gac quia' ni ²⁴zal-la' ruzxöni ladxa'a-në' Xanru' gunë' ga duyutea' lbi'ili'. ²⁵Lëzca' ráquida' run bayúdx gsöla'a-bi' ga zoali' bí'i böchi'ru' Epafrodito. Bi'i ni bënlenbi' neda'

tsaxón dxin queë' Cristo, gdíl-lentu' tu' xöhuí'. Lbi'iczi'li' bsóla'li'-bi' ga zoa' quië gáclenbi' neda'. ²⁶Lëczbi' ré'nibi' duyubi' lbi'ili' len sxzöni rui' ládxi'bi' lbi'ili' le nózili' ben bayá' queëbi'. ²⁷Le nactë güi'bi', guqui gatbi', san buechi' ladxë'ë-bi' Dios, len clëgz lébi', san buechi' ladxë'ë ca' neda', cui gsëbir ladxa'a ca na' rsëbi ladxa'a na'a. ²⁸Qui lë ni na', gu'nrdá' gsóla'a-bi' queëli' quië gac udzójili' leyúbl cati' ulé'ili'-bi', len cutur gsëbi ladxa'a neda'. ²⁹Gul-sí' lu na'li'-bi' lu yöl-la' rudziji queëli', nacbi' bi'i bóchi'ru' réjlë'bi' Cristo. Gul-gún ba la'n yúgu'të bunách nacgac ca nacbi' lébi', ³⁰le goza banádx queëbi' gatbi' le benbi' xchinë' Cristo len le güclenbi' neda' uláz queëli'.

Le nac gdu tsahui'

3 Na'a, böchi' lza'adau', gul-dziji le nacli' tuz len Xanru'. Cutu rupízxj neda' uzuja' queëli' leyúbl lë na' buzuja' queëli' zi'al, le gaclen lbi'ili' lë ni. ²Gul-gún chi'i cuinli' laugac nup ni' tun le cunác, nacgac ca bö'cu' snia', nup na' tun bayúdx ga grugu lu xpëla'que' bönni' le nac bë' nacque' queë' Dios. ³Rë'u nadél-li'ru' lë na' nac gdtë li, le nac bë' náquiru' queë' Dios. Le réjlë'ru' Dios, zóalenë' rë'u Dios Bö' La'y, ati' rudzójiru' le nacru' tuz len Jesucristo. Cutu ca' ruzxöni ládxi'ru' tu le runru' racz queëru'. ⁴La'naru' ruzxöni ládxi'ru' lë ni, lëzca' neda' chnadél-li'da' bi' uzxöni ladxa'a. Chqui' zoë' bönni' ráquinë' ulé' le nacué' le nunë', neda' nadél-li'rda' ca bönni' na':

⁵Grugu lu xpëla'a lë na' nac bë' cati' ni' gúquida' xunu' dza.

Gulja' ladj di'a dza guegac bunách Israel.

Naca' xzi'n xsoë' Benjamín.

Xuz xna'a nacque' gdu bunách hebreo.

Guca' bönni' gdau' fariseo ca na' bena' ca rna bë' zxba queë' Dios.

⁶Sxzöni bë' ladxa'a zxba na' ga bdxintë gdxia ládxi'gaca' bunách queë' Cristo.

Tsca gac gaquë' tsahui' bönni' le runë' ca rna bë' zxba na', nutu nu bi guc gnë quia'.

⁷Na'a, yúgu'të lë na' bena' zxön zi'al, nuzóa' tsla'l le náquida' queë' Cristo. ⁸Clëgz yugu' lë na', san nuzóa' ca' tsla'l yúgu'të le dë, quië gac gúnbë'a-në' Xanru' Jesucristo, le nactër lsaca' ca yúgu'të lë na'. Quië gúnbë'a Lë' gru'na' ni'l yúgu'të, ráquida' nac ca bëb, quië uzi'a xbë' Cristo, ⁹len quië gaca' tuz len Lë'. Nuhuöaca' tsahui', clëg le runa' ca rna bë' zxba na', san bunë' neda' tsahui' Dioscz le réjlë'a Cristo, ca na' ruünë' tsahui' yúgu'të nup ta'yejlë' Lë'. ¹⁰Rë'nzda' gúnbë'a-në' Cristo len soalen neda' yöl-la' huac queë' Dios le buspán Cristo lu yöl-la' gut, len quië guna' Lë' tsaxón, saca' qui'a ca na' gzxaca' gdi'ë Lë', len quië soa' sina' gatia' ca gutië' Lë', ¹¹le runa' löz Dios, uspanë' ca' neda' lu yöl-la' gut.

Le runru' quië gdxinru' xlatjru'

¹²Cutu rnia' chnadél-li'da' yúgu'të lë ni gunnë' quia' Dios, len cutu ráquida' chnaca' gdu tsahui'. Na'a, runa' bayúdx gdél-li'da' yúgu'të lë na', le chbdél-li'në' neda' Jesucristo. ¹³Böchi' lza'adau', cutu

ca' nadél-li'da' yugu' lè ni, san tuz le runa' bayúdx. Ruzál ladxa'a le chbdél-li'da', ati' runa' bayúdx gdél-li'da' le z'a za'. ¹⁴Runa' ca runè' bönni' jarélu'è rxít'i'è quiè gdxinè' xlatjè' gdél-li'nè' tu le uzi'è xbey. Cni runa' quiè gdél-li'da' lè na' bulidzè' rè'u Dios quiè gata' queèru' ni' yehua' yubá le nacru' tuz len Jesucristo.

¹⁵Cni ral-la' gunru' yúgu'tèru' rè'u, nac gdu ca réjlè'ru' Cristo. Chqui' ráquili' la'li' ral-la' gunli' tu le yubl, Dios uzéjni'nè' lbi'ili'. ¹⁶Na'a, ca nac lè na' bdél-li'ru', ral-la' gúnteczru' cni.

¹⁷Böchi' lza'adau', gul-gún ca na' runa' neda'. Chbului'itu' lbi'ili' ca ral-la' gunli'. Gul-yú ca tun nup na' tun ca na' bentu' netu'. ¹⁸Chgudxcza' lbi'ili' zian lzu, ati' rëpa' lbi'ili' leyúbl len yöl-la' rbödx quia', rnia': Le tunè' zian bönni' run ga nacqué' ca nup cuta'le'i Cristo dxi'a, le tu'zöé' tsla'l le benczè' Lè' lè'i yag cruz. ¹⁹Bönni' tunè' cni, lu gui' gabl' tsjaquè', le nac dios quequè' le ta'zéz ládxi'què', ati' tun ba zxön cuinquè' ni'a qui le tunè' le ral-la' gun ga lutui'inè'. Tui' ládxi'zè' le dè yödzyú ni, ²⁰san rè'u ni rui' ládxi'ru' le dè yehua' yubá ga nababru', len rbözru' dza huödè' Xanru' Jesucristo, Nu ruslá rè'u, urujè' yehua' yubá na'. ²¹Lè' utsé'è gdu ca nayá' nabinru', le rnitz, gunè' ga huöac ca nac gdu ca nayá' nabanè' Lè', le soa tsalzú. Cni gunè' len yöl-la' huac zxön queè' le ugunè' dxin quiè gna bé'inè' yúgu'tè.

Ral-la' udzjilenteczru'-nè' Xanru'

4 Qui lè ni na', böchi' lza'adau', gul-gác tsutsu ca réjlè'li'

Xanru'. Nadxí'itsquida' lbi'ili' len rè'nda' duyúa' lbi'ili'. Runli' ga rudzijda' len nacli' ca tu le ruzi'a xbey.

²Lbi'ili', Evodia len Síntique, ráta'yua' lauli' gacli' tuz ca ral-la' lac nup náquigac queè' Xanru'. ³Na'a, böcha'a gdu, rè'nda' gáclenu' gropnu ni, le glúnlennu neda' dxin, bentu' lban qui didza' dxi'a, ati' guladzaguè' ca' netu' Clemente len yezíca'rè' lza'a na'. Chnayujac laquè' yehua' yubá ga na' nayujac lagac nup chnadél-li'gac yöl-la' na'bán gdu.

⁴Gul-dzjilentecz-nè' Xanru'. Leyúbl, rnia': Gul-dziji. ⁵Gul-gác dxi'i ladxi' len yúgu'tè bunách. Chzoa huödè' Xanru'.

⁶Cutu ubi ugui'ili', san gul-náb lahuè' Dios le rquínili' len gul-guié': "Xclenu'", ca nac yúgu'tè lè na' rnabli'. ⁷Dios gunè' ga gac queèli' le cuequi dxi icj ládxi'dau'li', lè na' nadódr bë'i ca le gac la'yejni'i bunách. Lè na' rbequi dxi icj ládxi'dau'ru' gun chi'i icj ládxi'dau'li' len le rza' ládxi'li' le nacli' tuz len Jesucristo.

Ral-la' sa' ládxi'ru' le nacgac dxi'a

⁸Ga ruúdxte, böchi' lza'adau', gul-sá' ládxi'li':

yúgu'tè le nac dxi'a,
len le nac bica' ba,
len le nac gdu'tè li,
len le nac gdu,
len le nac tsahui',
len le nac ba'a,
len le nac lach,
len le ral-la' gunru' ba la'n.

⁹Gul-gún ca na' busèdda' lbi'ili', lè na' gzxi' lu na'li' tsca na' bé'lèna'

lbi'ili' didza' len tsca na' bena' ga ni' zoali'. Dios, Nu runn queëru' le rbequi dxi icj lãdxi'dau'ru' sóalenë' lbi'ili'.

**Le dxi'a glunë' queë' Pablo
bönni' Filipos**

¹⁰Rudzíjlenda'-në' Xanru' le rui' lãdxi'li' neda' leyúbl. Cutu rnia' gul lãdxi'li' neda', san cutu guta' queëli' latj gáclenli' neda' zi'al. ¹¹Lëzca' cni, cutu rnia' cni le zoa bi ryadzj quia', le nazëda' gdzag ladxa'a le dëz quia'. ¹²Chgdöda' lu yöl-la' yechi' len lu yöl-la' tsahui'. Nazëda' soa' nácti'tëz, zal-la' nöljda' o nabí l rduna', len zal-la' dë quia' szxöni o zoa bi ryadzj quia'. ¹³Yúgu'të huazáqui'da' le rutipë' ladxa'a Cristo. ¹⁴Benli' dxi'a cati' ni' gúclenli' neda', butipli' ladxa'a cati' gzxaca' gdi'a.

¹⁵Lbi'ili', bönni' Filipos, nóziczli' ca guc quia' dza ni' cati' buzá'a luyú Macedonia, yjena' lban qui didza' dxi'a. Tsca nacuá' bunách queë' Cristo, nutur nu guclen neda', san lbi'izli' gúclenli' neda'. Bsóla'li' quia' bi bunödzjli', le gzxi' lu na'li' lban bena' neda'. ¹⁶Tsal ni' gzoa' Tesalónica, tu chop lzu bsóla'li' quia' le bunödzjli' cati' ni'

byadzj quia'. ¹⁷Cutu rui' ladxa'a bi si'a, san rë'nda' gata'r queëli' le uzi'li' xbey yehua' yubá. ¹⁸Rëpa' lbi'ili': Chgzxi'a yúgu'të lë na' bsóla'li' quia', ati' gdödti bë'i tsca le byadzjda'. Ben ga nac cni lë na' bsóla'li' lu na'bi' bi'i Epafrodito. Lë na' bunödzjli' nac ca tu le rla' zxix rdxintë lahuë' Dios, len ca tu le rgu'ru' lahuë' Dios le rdzag ladxë'ë. ¹⁹Dios gunnë' queëli' yúgu'të le ryadzj queëli', tsca nac yöl-la' tsahui' rë' yehua' yubá, le nacli' tuz len Jesucristo. ²⁰Gactecz queë' Xuzru' Dios yöl-la' ba. Ca' gac.

**Tu'gáp Dios lza'gac
bunách queë' Cristo**

²¹Uláz quia' neda', gul-gáp Dios nup ni' náquigac queë' Dios le nacgac tuz len Jesucristo. Tu'gapë' lbi'ili' Dios böchi' lza'ru' ni nunquë' neda' tsaxxón. ²²Lëzca' tu'gáp lbi'ili' Dios yúgu'të nup ni náquigac queë' Dios, len lëzca' cni, tu'gapë' lbi'ili' Dios yugu' huen dxin nacu'ë lidxë' bönni' rna bë'ë gdu luyú Roma.

²³Rnabda'-në' Xanru' Jesucristo uzá' ladxë'ë queëli' yúgu'tëli'. Ca' gac.